


GWERZ**divvar-benn ar flodad listri kollet e-tal Penn-Marc'h**

Breman bloaz da foar santez Katell,
Sortias ar flod diouz a Vourdel.

Ha kaer o devoa naviget,
Avel a-walc'h ne gavent ket.

Pa voent erru e-tal Penn-Marc'h
O doa kavet avel a-walc'h...

Kouraj (1), kouraj, bugaligou,
Da vont 'benn avel d'ar C'helou.

Ma 'zeomp 'benn-avel d'ar C'helou,
Ni vo ka(v)et e Penn-Marc'h en
[aochou.

Petra c'hoarvez gant Penn-Marc'hiz,
O terc' hel goulou-noz 'n o iliz ?

Goulou a-drenv, goulou a-raok,
Me' sonje d'in be' a e kreiz ar flod...

Kriz e galon, neb na ouelfe
E-tal Penn-Marc'h neb a veze.

(1) Kalon !

O welt ar mor bras o ruzia
Gant gwad kristenien enna.

Neb a welfe merc'hed Gwaien,
O vont d'an aod peb a un(e)n,

Seiz intanvez ha seiz ugent,
O vont d'an aod en eur vandenn.

O c'houl' an eil digant eben :
— Na peus ket klevet kelou va den ?

— Kelou ho ten, ha va hini ?
E-tal Penn-Marc'h 'man o veuzi.

An oac'hig Dreo zo eun den mat,
N'eus sternet e garr d' o chareat,

Evit o c'has a dri da dri
Da vered Penn-Marc'h da interi.

Malloz, malloz da Benn-Marc'hiz,
A zalc'h goulou-noz en o iliz !

A zalc'h goulou 'n o ilizou,
'Vit ma yel' d'an aod batimanchou.

NOTENN

Desket eo bet ar ganaouenn-man ganimp, ton ha son, pa oamp o chom e... Gelveneg, da lavarout eo etre gwengola 1917 ha meurzh 1920.

Kanet e veze war eun dra gant meur a son vrezonек all, er beilhadegou-goanv, dreist-holl ; anavezet e oa gant an holl vartoloded ha bigoudenned. Lavaret e veze ne rae ket plijadur da dud Penn-Marc'h e glevout.

Anat eo n' eman ket ar ganaouenn en he fez evel m'he moulomp hizio. N' hon eus adskrivet, evit FALZ, nemet ar gwerzennoù hon eus klevet ha dres evel ma vezant kanet er Gelveneg. Ra zeüo eur c'hasker all gant ar gwerzennoù dianket. Ma vo miret da vad, ha brudet, eur son morel gwirion, fromus e levezon.

Youenn DREZEN.